

25 APR 2003

Abdullah-Gerbang (Bergambar)

KERAJAAN TIADA MASALAH BIAYA PROJEK GERBANG SELATAN, KATA ABDULLAH

JOHOR BAHRU, 25 April (Bernama) -- Datuk Seri Abdullah Ahmad Badawi hari ini berkata kerajaan tidak mempunyai masalah dengan pembiayaan projek Gerbang Selatan Bersepadu (GSB) yang dianggar menelan belanja sebanyak RM1.2 bilion dan dijangka siap pada Okt 2005.

Pemangku Perdana Menteri berkata jika pembiayaan bagi projek yang akan menggantikan kompleks Kastam, Imigresen dan Kuarantin (CIQ) lama di Tambak Johor itu bermasalah sudah tentu kerajaan tidak akan memulakannya.

"Tidak. Jika kita ada masalah kita sudah pasti tidak memulakan projek ini," katanya kepada pemberita selepas meninjau dan mendengar taklimat tertutup oleh pemajunya, Gerbang Perdana Sdn Bhd, di tapak projek di sini.

Beliau berkata demikian ketika menjawab soalan pemberita sama ada kerajaan mempunyai masalah berkaitan pembiayaan projek itu.

Projek di Tanjung Puteri di tengah-tengah bandaraya ini yang menghadap ke Selat Tebrau juga merupakan projek milik sepenuh Malaysia dan tidak membabitkan pihak lain, katanya.

Semua kerja telah berjalan dengan baik tanpa apa-apa gangguan, dan menyatakan harapan projek itu dapat disiapkan mengikut jadual.

"Pihak jabatan-jabatan terlibat termasuk Kementerian Kewangan, Jabatan Kerja Raya dan juga Kerajaan Negeri Johor...kita akan pastikan apa juga keputusan yang diperlukan oleh pihak yang melaksanakan projek ini akan dapat diberikan dengan cepat," menurut beliau lagi.

Abdullah berkata ini supaya tidak ada gangguan yang akan menyebabkan kelewatan dalam melaksanakan projek itu, yang apabila siap kelak akan memberikan imej baru pada pintu masuk utama ke negara ini di selatan tanah air.

Dengan rekabentuk menarik seperti mana menariknya bangunan terminal Lapangan Terbang Antarabangsa KL (KLIA) di Sepang, kompleks CIQ baru itu juga akan dapat mengatasi masalah kesesakan lalulintas yang teruk sekarang di Tambak Johor.

Menteri Besar Datuk Abdul Ghani Othman dan Menteri Kewangan Kedua Datuk Dr Jamaluddin Jarjis turut mengiringi lawatan Abdullah ke situ.

Perdana Menteri Datuk Seri Dr Mahathir Mohamad melakukan upacara pecah tanah bagi memulakan kerja projek itu pada Feb lepas.

-- BERNAMA

MNY MHI PR